



**IJWI RY'UBUHANUZI
ISHURI RYA BIBILIYA
MW IPOSTA**

B.P. 1710

— BUJUMBURA —

BURUNDI

ICIGWA CA 18

**ABANA B'IMANA NTIBAZOSUBIRA KU CAHA
CA ADAMU**

Umurongo wo kwibukwa : « Mbega umuntu yogunga Imana ?
Ariko mwebwe mwarangunze. Yamara muravuga, muti Twaku-
gunze ibiki? Mwangunze ikigiracumi n'amashikanwa. » Malaki
3 :8.

URWINJIZO

Mbega umuntu aba acumuye iyo atwaye ikintu c'Imana ?
Igitabo c'Imana kitubwira, kiti « Kuko gukunda amahera ari
imizi y'ibibi vyose. » 1 Timoteyo 6 :10. Abakozi b'Imana n'aba-
kozi ba Satani bazamenyekanira ku mahera. Abigishwa ba Yesu
mbere bari bazi ko bacungujwe amaraso y'Umwana w'Imana.
Kubera ivyo nta muntu n'umwe wo muri bo yabona kw amafanga
canke ubutunzi bwiwe ari ivyiwe bwite. Biyita ivyariho vy'Imana.
bakoresha ubutunzi bahawe n'Imana ngo bafashe bagenzi babo.
Ikintu umukristo ategerezwa kumenya n'uburyo bwo gukoresha
amafanga. Tuzomenya neza uku kuri twiga iki cigwa.

MBEGA IMANA HAR'ICO IKENEYE ?

1. Mbega Imana yita ku vy'umuntu akeneye nk'amafanga n'ivyo-
kurya n'impuzu ?

« Nuko ntikumukiganyire, ngo Tuzorya iki? canke Tuzonywa
iki? canke tuzokwambara iki?... ariko So wo mw'ijuru arazi
kw ivyo vyose mubikena. » Matayo 6 :31, 32.

Nta yindi dini igaragaza imbabazi n'umunezero Imana igirira
umuntu nk'idini nyakuri ya Gikristo. Niba Data wo mw'ijuru
yita no ku kintu gito gipfuye, (Matayo 10 :29) none ntazokwita
ku vy'umuntu akeneye ? « None mwebwe ko muzi guha abana
banyu ingabire nziza muri babi, mbega So wo mw'ijuru ntazo-
rushiriza rwose guha ivyiza abamusavye? » Matayo 7 :11. Nuko
rero dukwiye guhanga Imana amaso mu bukene bwacu bwose
hako dutega amakiriro ku muntu, canke ngo twirarire twihenda
ngo nitwe twironkesheje ibidutunga tudafashijwe n'Imana.

2. Mbega inkomezi zo kuronka ubutunzi tuzivana hehe?

« Ariko muze mwibuke Uhoraho Imana yanyu, kukw ari we azobaha ubutore bwo kuronka ubutunzi. » Gusubira mu Vyagezwe 8 :18. Isi n'iy'Uhoraho kabiri. Ubwa mbere n'uko yayiremye, ubwa kabiri n'uko yayicunguye. Isi yose n'iyayo. Ya, bwiye abana b'Isirayeli, it' « Amatongo ntaz'agurwe herandaheze kukw igihugu ar'icanje, namwe kuri jewe mukaba akavantara n'abatsi b'indaro. » Abalewi 25 :23. « Ereg'Uhoraho Imana yanyu ni we Nyen'ijuru risumba ayandi, bo n'isi n'ibirimwo vyose. » Gusubira mu Vyagezwe 10 :14. « Amafeza n'ayanje, n'amazahabu nyene n'ayanje, ni k'Uhoraho Nyen'ingabo agize. » Hagayi 2 : 8.

Ababa kw isi bafise ivyiyumviro bibiri. Icyumviro kimwe n'ic'ukuri, ikindi s'ic'ukuri. Kimwe n'ic'Ubukristo ikindi n'ic'Ubupagani. Kubw'ubuhirwe buke, ic'ubupagani ni co cakwiye mw isi yose n'ubu : mbere no mu Bakristo benshi. Ico cyumviro ca gipagani co kigomba ko abanyagihugu n'ubutegetsu bishingira INGANJI. Na ho icyumviro ca Gikristo cigisha kw Imana ari yo itwara ibintu vyose.

« Kukw ibikoko vyose vyo mu kibira ar'ivyanje, n'inka zo ku misozi y'ibihumbi. Ndazi inyoni n'ibisiga vyose vyo ku misozi, n'ibikoko vyo ku gahinga n'ivyanje. » Zaburi 50 :10, 11.

3. Naho ibintu vyose ar'ivy'Imana, mbega ukubaho kwa Yesu kwari kumeze gute ubwo yari mw isi?

« Yesu aramubwira, at'Imwebwe ziri n'imyobo, n'ibiguruka mu kirere biri n'ivyari, arik'Umwana w'umuntu we ntagir'aho arambika umusaya. » Luka 9 :58.

Uko Kristo yabereye umukene mur'iyi si kandi ari we yaremye ibintu vyose, niko n'ibikorwa vy'Imana bimeze mur'iyi si. Imana yaka amashikanwa yo kuzanwa mu nzu yayo ngo afashe igikorwa cayo co gukwiza ubutumwa. « Muzane mu bubiko ikigiracumi gishitse, kugira ngw inzu yanje ibemw ivyokurya... » Malaki 3 :10.

4. Kuk'ico kintu gikenewe mu bikorwa vy'Imana?

« Mbega umuntu yogunga Imana? Ariko mwebwe mwaringunzwe... kukw ihanga ryose uko mungana mwangunze ». Malaki 3 :8,9.

5. Umuntu yokwima Imana ivyayo ate?

« Yamara muravuga, muti Twakugunze ibiki? Mwangunze ikigiracumi n'amashikanwa. » Malaki 3 :8.

Naho isi yose ar'iy'Imana n'ubutunzi bwose kandi mu vy'ukuri akaba ar'ivyayo vyose, ishaka k'umuntu yemera ko iriho, kandi ari yo Nyenevyo, akavyerekana mu kuyiha ikigiracumi. Ivuga ko uwo mugabane ari uwayo bwite. « Mu vyeze mu gihugu, vyaba ivyo mu ndimiro, ... ikigiracumi c'ivyo vyose n'icanje, jewe Uhoraho ; n'icera canje ». Abalewi 27 : 30. Umuntu aba mu nzu y'uwundi, akarima umurima wiwe, ategerezwa kugira ic'atanga ukw'ukwezi gutashe canke umwaka. Kwima nyene inzu ico mwavuganye n'ukumwambura. Ukurikije ico cyumviro usanga ko kudaha Imana ikigiracumi c'ivyo twunguka vyose n'ubutunzi twahawe n'Imana, ar'ubwambuzi.

« Iyo abemera Imana bosa baba bayiha ikigiracumi n'amashikanwa, mu nzu y'Imana hobayemw'ivyo kurya. Ubuntu si bwo

bukwiye kwizigiza kuzohabwa ingabirano zitari iz'ukuri zisa n'iz' agahato, no guhindagurika kw'ivyiyumviro vy'abantu nk'uko bigenda. » Councils on Stewardship, p. 196, 200.

« Iyaba abantu bose baha Imana ikigiracumi, ari co mugabane wayo, ububiko ntibuba bukeneye imali. » Idem. urupapuro rwa 95.

6. Nah'Imana yihangana kandi ikagirira imbabazi abayiba, ni gihano ki giteye ubwoba bazohanwa?

« Wa muvumo murawuvumwe : kukw ihanga ryose uko mu-ngana mwanguze. » Malaki 3 :8.

7. N'iki kitwereka ko kwiba Imana mu vyo twunguka bitera umu-vumo bikabuza imvura kugwa mu mirima?

«... Nimwitegereze uko mumeze ! Mubiba vyinshi, muki-mbura bike ; kurya murarya, ariko ntimushira inzara ; kunywa muranywa, ariko ntimushira inyota ; kwambara murambara, ariko ntimushira imbeho ; kandi uca amahera ayacira mu mufuko utobotse. Uku nik'Uhoraho Nyen'ingabo agize, ati Nimwitegereze uko mumeze !... Mwaziga vyinshi, mugize murtya musanga ni bike ; kandi n'iyi mubizanye i muhira, ndabigabanya. Biva kuki? Ni k'Uhoraho Nyen'ingabo abajije. Biva ku ngoro yanje irekewe ngaho igihomvagaritse, namwe mweho umuntu wese agakobereza inzu yiwe ubwiwe. Ni co gituma ata n'akame ijuru rikibarekurira, n'isi ikabima ivyimburo vyayo. Kandi nahamagaye uruzuba ngo rwice isi n'imisozi rukureho n'impeke na vino, n'amavuta ya elayo, rwice n'ibimera mu ndimiro, n'abantu n'amasho, n'ibikorwa vyose bikoreshwa amaboko. » Hagayi 1 : 5-11.

Ben'ibi bishika ku badatanga neza ikigiracumi n'imperezwa kangaha ? Kurumvya imirima kenshi na kenshi canke guhomba mu bucuruzi bikwiye kubakangura kugira ngo « bategere inzira zabo. » None ntihar'aho ivyo vyoba inyanduruko yo kurumvya guterwa n'inzige, n'indwara zonona igihugu cacu? Mbere n'abahabwa impembo z'ibikorwa bakora, bavumwa iyo mivumo, iyo banse guha Imana umugabane wayo bagororotse. Kenshi impembo zabo ziragabanuka cane, bigasa nk'aho babibitse mu « mifuko itobotse ».

IVYO YESU YIGISHIJE BIHEREREYE KU BUTUNZI.

8. Yigishije uburyo bwiza bwo gukoresha amafranga ate ?

« Namba mutabaye abizigirwa kw'itunga ribi mubikijwe, ni nde azobabitsa itunga nyaryo? Kandi namba mudakora ivyo mwizigiweko ku vy'abandi mwabikijwe, ni nde azobaha ivyo mwokwiganzira ? Luka 16 :11, 12.

N'igitangaza kubona ko kenshi Yesu yavuga ivyerekeye ku mali n'ubutunzi. Umurongo umwe kur'iyi itandatu yo muri Matayo, na Mariko na Luka, uvuga ivy'amafranga. Mu Migani 16 Yesu yaciye, yigishije uburyo bwo gukoresha amafranga neza canke nabi. Uburyo bwo gukoresha imali n'icigisho gihambaye mu batumwa. Gutanga imali mu buryo bubi n'ikintu gitsinda abakristo kikababuza ubuzima buhoraho, naho bokwizigirwa mu bindi. Mu buryo umuntu akoresha imali kenshi bimubera ikigeragezo c'ubutungane bwiwe, kuraba kw'ategekwa n'imali canke kw'ari we ayitegeka. Gukunda imali bituma bamwe bikunda gusa, Babandanya kwigungirako no kwikunda. Gukunda imali bijana umuntu mu bibi. Gukunda amafranga bikomeza ingeso itanye rwose

n'iciyumviro ca Yesu. « Nabahaye akarorero muri vyose, yuko mu butume nk'ubwo, ari ko mukwiye gufasha abadakomeye, no kwibuka amajambo y'Umwami Yesu, ingen'ubwiye yavuze, ati Gutanga kuzana umugisha, kuruta guhabwa. Ivyakozwe n'Intumwa 20 : 35.

9. Mu nkuru z'isi za kera umuntu yatanguye gutanga ikigiracumi ni nde ?

«...Melekisedeki uyo, Umwami w'i Salemu, umuherezi w'Imana isumba vyose, ... ni we Aburahamu yagabanirije ikigiracumi muri vyose ». Abaheburayo 7 : 1, 2.

Yakobo umwuzukuru w'Aburahamu na we yatanze ikigiracumi c'ivyo yungutse vyose. (Itanguriro 28 :20-22). Amahanga yose ya kera yar'azi ko ikigiracumi c'ubutunzi ar'icera c'Imana nk'uko bari bazi ko umusi w'indwi w'umushamvu ari uw'Uhoraho. Satani yandurishije abantu ububasha bwiwe bituma birengagiza uko kuri. Kristo ubwiye yagumije uko kuri kwo gutanga ikigiracumi.

« Muzobona ibara, mwebwe abanyabwenge b'ivyanditswe n'Abafarisayo, mwa ndyarya mwe, mutanga ikigiracumi c'imbwija n'anisi na kumino, ariko mwaretse ibihambaye vyo mu mabwirizwa, guca izibereye n'imbabazi, n'ukwizera ; ariko ivyo mwari mukwiye kubikora, vya bindi navyo ntimubireke. » Matayo 23 :23.

10 N'ikihe kigabane c'ivyo dutunze Imana igomba ko tuyaha ?

« Mu vyeze mu gihugu, vyaba ivyo mu ndimiro, cank'ivyamye mu biti, ikigiracumi c'ivyo vyose n'icanje, jewe Uhoraho, n'icera canje... Kandi mu masho no mu mikuku, uko zigenda ziharuzwa inkoni, ikigiracumi co muri zo zose, kize kube icera canje, jewe Uhoraho ». Abalewi 27 : 30-32.

Ikosa rikomeye abantu bakora n'uko bibwira ko bakwiye gutanga ikigiracumi c'amafranga bunguka gusa. Yakobo yashima gutanga ikigiracumi c'ibintu Imana yamuha vyose, mbere n'ivyokurya n'imyambaro. » (Itanguriro 28 :20-22).

Tugitangura kwishikanira Umucunguzi, dukwiye guca dutanga ikigiracumi c'ivyo dutunze vyose, mbere n'ikigiracumi c'imali yacu yose iri muri Banki. S'ugukekeranya ivyo bizana amaherezo meza cane mu bubiko bw'igikorwa c'Uhoraho, ariko kutabikora, ari navyo vyabaye umugenzo, bigira inkurikizi yo gusubiza ico gikorwa inyuma, iyo ico kigiracumi kidatanganywe ubutungane, Satani aboneraho kuzana ubugunge bwiwe mw ishengeru rigahabwa umuvumo mu gishingo c'umugisha.

Iyaba abizera bose batanga ikigiracumi c'ivyo bejeje, n'ic'ibitungwa vyabo vyose, n'ic'imali babitse muri Banki bagishika mw idini, ishengeru ryo muri Afrika ryoteye imbere nk'iryo mu bindi bihugu vyakiriyemo ijambo ry'Imana ku bwo gutanga ikigiracumi.

Niba har'umukristo uw'ariwe wese atatanze ikigiracumi agishika mw ishengeru ngw'abe yaratanguye ivyo yungutse vyose, n'imali yiwe yashize muri Banki, ategerezwa kugitanga ah'amenyeye uku kuri bidatevye. Hanyuma akomeze atange ikigiracumi c'inyungu y'ibitungwa vyawe, n'ic'ivyo yimbuye n'ic'umushahara, n'ivyo ahabwa ku bantu (gusa). Asangwa wiyumvira ko guharura ikigiracumi bigoye, reka twiyumvire gatoyi, biroroshe guharura ubutunzi bwawe, maze Imana ikaduha ikigiracumi cavyo. Ubwo rero tuba dukwiye guharura ikintu cose dushizeko umwete, dufise umutima wifuzako ico Imana izotwongera. Nuko rero dukwiye guharura ikigiracumi tubereyemw'Imana twitonze kandi dufise umwete. Iki ni co gicumuro cabaye gikwira mu bantu ; kubwo

kwifuza kubi canke ku kugeragezwa no gutanga udufaranga du-
ke gusa, maze tukatwita ikigiracumi ; kandi mu kuri kidakwiye
no kuba ikigira ijana nyakuri. Ico caha co guhenda Imana, tukaba
twongeyeko n'ikindi gicumuro co kuyiba. Abamarayika bo mw
ijuru bandika ivyo abantu bakora mu bitabo vyo kwibutsa ku
musi baraba uko tugira ku bintu bito bito. Yesu yaravuze, ati
« Ukora ivyo yizigiweko ku vyoroshe cane, agira artyo no ku gi-
komeye. » Luka 16 : 10. Mur'uyu murongo Yesu yavuga ivy'
imali.

UBURYO BWO GUHARURA IKIGIRACUMI

11 Mbega ni waba urimw'umwenda w'umuntu maze akaguma akwi-
shuza, Imana izokubabarira udatanze ikigiracumi ?

« Wubahishe Uhoraho ibintu vyawe, bo n'umushuzo w'ivyeze
vyawe vyose. » Imigani 3 :9.

Itegeko rya mbere ryo mu mategeko cumi rivuga, ngo « Ntu-
kagire izindi mana umbangikanya. » Kuvayo 20 :3. Kwiba Imana
umugabane wayo ar'ukugira ngo wishure imyenda y'ivy'isi, mu
vy'ukuri n'ukwica amabwirizwa. Ntidufise ububasha na gatoya
bwo gukoresha imali y'Imana twishura imyenda turimwo kuko
iyi mali atari iyacu. Inzira y'ukuri umuntu akwiriye gukurikiza.
n'iyi. « Kubahisha Uhoraho » gutanga imigabane ya mbere
y'ikigiracumi ntaragerageza kugikoresha mu buryo butabereye.

Umuyobozi w'umukristo w'intwari, umusi umwe yaravuze
ati : « Mbega nokwubahuka nkakubwira yuko udakwiye gutanga
ikigiracumi kandi ukibazwa? » Mbe nokubwira ukuri ntiwishure
umwenda wishuzwa n'umuntu uw'ari we wese, kandi uramutse
ubigize gurtyo woba wimye Imana ivyayo ?

Abahisemwo gukurikira Imana n'imitima yabo yose, bakaba
bahisemwo kwubaha Imana, abatazatwara ivyimbura vyagerewe
Uhoraho ngo bavyishure imyenda bafitiye abandi, abaha Uhoraho
ikigiracumi bironkeye ubwabo, bazohabwa imigisha y'Imana
yemerewe abayumvira. » Councils of Stewardship, urup. 92, 93.

12 Umurimy yoharura kimwe mw icumi ate ?

Umurimy wese azi ubwenge, arazi ingene yoharura ibitungwa
vyiwe n'ivyo yimbuye. Acisha ibitungwa vyiwe mw irembo aka-
biharura, maze igitungwa cose kibaye ikigiracumi. kigashirwa
iruhande kikaba ikigiracumi. Imana iravuga iti : « Umuntu ntaze
yibaze kw ari nziza, canke kw ari mbi, canke ngw ayikabe iyindi. »
Abalewi 27 : 33.

Niko bikwiye kugenda, akwiye guharura imifuko y'ibigori,
canke y'amahonda, canke ibindi yimbuye mu murima wiwe. Azo-
harura imbu z'amata y'inka ziwe, maze hanyuma atange urubu
rugiracumi rw'amata yose, arugurishye amafranga ku giciro gikwiye,
maze ayo mafranga ayatangeko ikigiracumi.

Reka dutangire akarorero ku muntu afise inka zidashika kw'
icumi. None yozitangira ikigiracumi gute? Tuvuge ko yoba
afise impene canke intama canke inkoko zitogabanyamwo icumi
mu buryo bworoshe. Turatanga akarorero kugira ngo umuntu
wese abisobanukirwe.

Tuvuge ko umuntu afise inka zitandatu, n'intama 11, n'impene
6, n'inkoko 7, indogoba 1. None ivyo vyose yobitangira ikigira-
cumi gute? Ubwa mbere azoharura igiciro c'ivyo bitungwa
akurikije igiciro c'uko vyogurwa mw isoko. Kugira ngo abiso-
banukirwe neza, akwiye guhamagara umurongozi w'ishengero,

canke incuti imwe canke zibiri zikamufasha kubicira. Yobigenza artya :

Igicro c'impfizi imwe	3.000,00 frs
Igicro c'inka zitandatu	22.750,00 frs
Igicro c'intama cumi n'imwe	2.300,00 frs
Igicro c'impene cumi na zitandatu	4.320,00 frs
Igicro c'inkoko indwi	210,00 frs
Igicro c'indogoba imwe	1.000,00 frs
vyose hamwe	13.580,00 frs

Ikigiracumi gikwiye kuba ikigabane kigira icumi c'igitigiri cose, ari co 13.580,00 frs. Kubona ico gitigiri biroroshe cane. Ufise amafanga woca uyatanga. Utayafise naho ugatanga igitungwa kimwe giciye ayo mahera kugira ngo ubone ico kigiracumi c'amafranga 1.358.

Aya mafanga ayatanze hatabuzemwo na rimwe, maze ahabwa urupapuro (Reçu) rwemeza ko ayatanze. Gurtyo rero ico kigiracumi kizoba gitanzwe. Hanyuma niho azoza aratanga ikigiracumi akurikije uko ibitungwa vyawe birondoka.

Reka tubandanye dutange akarorero. Tuvuge nk'umuntu afise umurima. Ntiyonezerwa no kugorwa aharura ivyo yimbuye. Yokora kimwe mu'ibi ukw ari bibiri :

(a) Yotora urupapuro canke igitabo akaja aracandikamwo urugero w'ibigori n'amahonda, n'imyumbati n'ibijumpu, n'amata cank' ibindi, canke agahitamwo :

(b) Gushira mu giseke canke idebe, akaza arashiramwo ikigiracumi c'ivyo yimbuye ku musi, n'ic'ivyokurya bimumutunga n'abo mu rugo rwiye, n'ivyo ashobora kugurisha. Igihe iyimbura rigeze, akwiye guharura imifuko canke amadebe yimbuye canke kilogrammes yimbuye, maze ikigiracumi kigashirwa ukwaco. Niba ufise iduka, ukwiye gutangura ikigiracumi ughinduka umukristo, ugatangira ibiri mu iduka ryawe vyose. Kuva ubwo ugatangura gutanga ikigiracumi c'inyungu gusa ukw'ukwezi gutashe cank'umushamvu. (Asangwa umwigishwa afise ibimugora vye-rekeye gutanga ikigiracumi, agiriwe inama yo kwandikira IJWI RY'UBUHANUZI ikete ry'ibimukomereye.)

TWOSUBIRA KU GICUMURO CA ADAMU GUTE ?

13. Mbe kimwe mw icumi c'Uhoraho gihabwa nde ?

« Mu vyeze mu gihugu vyose ikigiracumi n'icanje, jewe Uhoraho, n'icera canje ». Abalewi ehe mbahaye ibigiracumi vyose Abisirayeli batanga, kuba ari vyo biba ishamvu yabo, ndabibahaye kw impembo y'ibikorwa bakora vyo mu'ihema ry'ibonaniro ». Abalewi 27 :30, no Guharura 18 : 21.

Imana yategetse kw ikigiracumi gitunga abavuga butumwa bamara igihe cabo cose bakora umurimo (igikorwa) wo mu'ihema ry'ibonaniro. » Intumwa Paulo yavuze, ati « Kandi n'Umwami wacu niko yageze kw abavuga ubutumwa bwiza batungwa n'ubutumwa. » I Ab'i Korinto 9 :14.

Ishengero ni « inzu y'Imana ». Iy'Imana ivuze ko dukwiye kuzana ikigiracumi mu nzu y' « ububiko » kugira ngo mu « nzu » yanje, n'ukuvuga ISHENGERO, niho ikigiracumi kijanwa mu bubiko bw'ishengero kikahavanwa gihembwa abakora umurimo wo kuvuga ubutumwa bagororotse kandi bavyitangiye.

Ukwiye gutanga ikigiracumi mw ishengero wizera ko ari ryo shengero ry'ukuri ry'Imana. Niba ata shengero riri hafi y'aho uba ryigisha ukuri kw ijambo ry'Imana kwose, IJWI RY'UBUHANUZI rizokwakira ikigiracumi cawe rikurungikire Reçu yaco.

Ikigiracumi cawe kizokora umurimo cagenewe ari wo wo gukwiza ubutumwa. Abantu benshi babona ko gutanga ikigiracumi mu mashengero yabo mato mato bibakomereye, barungike ikigiracumi kw IJWI RY'UBUHANUZI. Ikigiracumi kirungikwa gicishijwe kuri Mandat Postal (urupapuro ruhabwa urungitse amafanga ayacishije muri Poste), yaba ari make agacishwajmw iposta uyashize mw ibahasha ushizeko timbre.

14 Mbega icyo kigiracumi cokoreshwa n'ugomba wese, acihera abakene nk'amashikanwa y'ubundi buryo afashishwa abantu?

Imana yafashe ikigiracumi kiba inyegu ngo gikoreshe n'Abalewi imisi yose n'« abavugabutumwa ». Ni co gituma tudafise ububasha bwo kugira uwo duha ikigiracumi canke ngo tugifashishe abakene, canke kugikoresha mu bundi buryo ubw'aribwo bwo. Nuko ivyiza n'ugutanga imperezwa mu buryo bukwiye, butari ubwo gukoresha aya mafanga y'ikigiracumi.

Imana yagiriza abantu bayo ko bayimye « IKIGIRACUMI N'AMASHIKANWA ». Iyodutanze ikigiracumi cacu, bisa n'aho ataco tuba duhaye Imana, ahubwo tuba tuyishubije ivyayo.

Turetse ikigiracumi dutanga, n'imperezwa yacu yerekana urukundo dukunda Imana n'ishimwe tuyishimira ivyo iduha vyose vy'igicro cinshi. Paulo avyaha ivyo gutanga, ati « Ariko nk'uko murushiriza kugira vyose, ... nimurushirize no kugira ubwo buntu nabwo. » 2 Ab'i Korinto 8 : 7.

Iyo umuntu asobanukiye n'urukundo rw'Imana Data kur' iyo ngabirano yacu y'ibihe vyose, ariyo Yesu Kristo, n'uburyo yitanzwe agakengerwa yicisha bugufi, yokwiga « gutanga » aneze-rewe. Kugira ngo n'abandi bamenye uwo Mukiza. « Kuko muzi ubuntu bw'Umwami wacu Yesu Kristo, yuko naho yari umutunzi yahindutse umworo ku bwanyu kugira ngo ubworo bwiwe bubatungishe. » 2 Ab'i Korinto 8 : 9

Niba urukundo rwa Kristo ruri mu mutima vy'ukuri, umuntu ntazoremerwa n'ayo mashikanwa yo gufasha umurimo w'Imana, naho ari menshi.

15. Mbega n'iki gitera gukora no kugira imibereho rukristu?

« Ni haba har'ugomba gukora ivyo uwo akunda, azomenya izi nyigisho, ko zavuye ku Mana, canke ko mbivuga mvyigeneye ». Yohana 13 : 17. « Nimwamenya ivyo muzoba muhuriwe, ni mwabikora. » Yohana 13 : 17.

Imana yagabiye Adamu, isi n'ibiyirimo vyose, ariko imubuza igiti kimwe gusa ; Ngo areke gukora ku giti kimenyekanisha ivyiza n'ibibi. Ico giti Imana yavuye ni co yifatiye ibuza Adamu kurya ku mbuto zaco. Ico giti car'ico kwibutsa Adamu ko ivyo afise vyose yabihawe n'Imana, na ho akaba icariho cayo gusa. Yar' akwiriye kumenya ubutegetsi n'icubahiro vy'Imana aramutse ayumviye. Ariko akora ikibi atwara ivy'Imana. Niko bimera iyo umuntu atwaye ica cumi. Uko Imana yageze ubuyobohe bw'Adamu, nikw igera ubuyobohe bw'umuntu mur'iki gihe. Mbega uzonesha uko kugeragezwa. Canke uzoyihebere ibiri ivyayo?

Kumvira n'inzira izana imigisha, n'icubahiro co kuja mbere mu vy'umutima. Uko wize kw icyo kigiracumi ar'ic'Imana, ni vyiza cane, noneho tangura kukitanga neza. Ukwiye kubikora. « Enda nimubingeragereshe ni k'Uhoraho Nyen'ingabo agize... » Malaki 3 : 10. « Muzane mu bubiko ikigiracumi gishitse, kugira ngw inzu yanje ibemw'ivyo kurya ; enda, nimubingeragereshe, ni k'Uhoraho Nyen'ingabo agize, murabe ko ntazobagomorerera ingomero zo mw ijuru, nkabacuncuburira umugisha, mukabura aho muwukwiza. » Ntutebe, « Ehe none n'igihe co kwemererwamwo. » 2 Ab'i Korinto 6 : 2. Noneho ncuti, gerageza, kwumvira niyo nzira y'imigisha.

IBIBAZO VY-ICIGWA CA 18

1. Umuntu Yokwiba Imana ate?

- A. Mukugunga abavukanyi
- B. Mukurya ivyo atakoreye
- C. Mukudatanga ikigiracumi n'amashikanwa

2. Umuntu yatanguye gutanga igiracumi ni :

- A. Adamu
- B. Abel
- C. Aburahamu

3. Ikigiracumi n'ico gufasha

- A. Abakene n'imfuvyi
- B. Abakristo bose
- C. Abavugabutumwa

4. Ufise umushahara wa 61000Fbu yotanga ikigiracumi c'angahe?

- A. Ayo ashaka yose
- B. 610Fbu
- C. 6100Fbu

IJWI RY'UBUHANUZI
ISHURI RYA BIBILIYA MW IPOSTA
B.P. 170 Bujumbura
Burundi.



Izina.....

Ah'uba

.....